

Pro rumantsch deplorascha la decisiun

■ En la part rumantscha dal Plan d'Instrucziun 21, relaschè ils 26 da november 2015, na prevesa la regenza naginas pretensiuns u competenzas liantas da leger e chapir la lingua uffiziala rumantsch grischun, er betg per il stgalim superiur da la scola populara.

Cun questa decisiun surpiglia ella simplamain la proposta da la Lia Rumantscha che lezza ha laschè dictar da la Pro idioms. La soluziun da la Lia Rumantscha va schizunt anc pli lunsch, a disfavur dal rumantsch grischun en scola, uschia che quella na po en nagins regards vegnir considerata sco ina proposta da consens da l'entira Rumantschia. Betg mussar da leger la lingua uffiziala vul dir cementar la spartiziun da la Rumantschia e sustegnair l'idea nunrealistica che la pitschna cuminanza rumantscha haja la substanza e la forza da tgirar a lunga vista pliras linguas scrittas l'ina sper l'autra. Che quai n'è betg il cas mussa l'istorgia rumantscha a moda drammatica.

L'exempel da «Spick»

In eclatant exempel actual è la revista da giuvenils «Spick» che cuntogna en la medema ediziun rumantscha mintgamai in pèr paginas en tschintg idioms ed en rg. Suentar paucs onns fa quella uss naufragi perquai che lecturas e lecturs legian mo las parts en l'agen idiom. Malgrà il resguard da tut ils idioms aveva l'ediziun mo 150 abunnts! Sch'ìls uffants emprendessan a leger rg – ch'els chapissan lura senza grondas difficultads – fiss il potenzial d'abunnts bler pli grond e l'existenza da tals projects innovativs garantida. Igl è da temair ch'er auters projects en plirs idioms van la finala la via dal «Spick» perquai che viver sur las atgnas relaziuns e betg s'adattar a novs bassegns n'è ni sin plaun privat ni public in model da success.



Ils uffants da Surmeir emprendan rumantsch grischun da l'emprima a l'ultima. FOTO Y. BÜRKL

Laschè dictar da Pro idioms

Las conferenzas generalas da la Surselva e da l'Engiadina avevan anc avant dus onns declerà dad acceptar il rg sco lingua da leger sin il stgalim superiur. Dumandadas uss da la LR da far pli pauc che quai, n'han ellas sa chapescha betg ditg na.

Cun sia decisiun sanzciunescha la regenza che la LR ha rut cumpromiss e cunvegna per ina coesistenza dals idioms ed il rg, cuntanschids entaifer la Rumantschia. Ella va la via da la pli pitschna resistenza e ceda a la pressiu da quella gruppa che fa il grond squitsch e la pli gronda canera.

Il rumantsch grischun sa cumprova di per di en plirs secturs, en las novitads dad RTR, en La Quotidiana e tar blers auters products attractivs er adattads per la scola populara. En ina scola sin l'autezza dal temp stuess el avair ses plaz cler.

Nus deplorain che la regenza ha traslascià da motivar ed obligar la scola da far in modest pass enavant per concentrar las stgarsas forzas avant maun. E ch'ella na tegna betg quint da lezza part da la populaziun, pronta per novas soluziuns e per mesiras che mainan la cuminanza rumantscha en l'avegnir.

Violescha la regenza la constituziun?

I sa tschentan uss duas dumondas: Violescha la regenza cun sia decisiun ils arttgels da las constituziuns chantunala e federala e da leschas areguard promover il rumantsch? E fa la LR cun sia proposta che rumpa cunvegna sia obligaziun da defender e represchentar ils interess da l'entira cuminanza u represchenta ella mo interess particulars? La dumonda n'ha betg mo ina vart giuridica, mabain er etica. Ella vegn a fatschentar nus vivand e fatschenta speranza anc bleras e blers auters.

Pro Rumantsch